


卷之六

山陰 陳士錫 敬之甫 著

大正 長崎 凌井 俊元 氏甫 校



Faint vertical text columns, likely bleed-through from the reverse side of the page.



門 七武
冊 186
卷 14止

岡氏
杏庭

岡氏
杏庭

辨證錄幼科卷之十四

小兒生來土不夜水瀉風清

山陰 陳士鐸敬之甫著

松井家藏

驚疳吐瀉門

大日本 長崎 淺井俊元民甫校

兒科之病驚疳吐瀉為多四者又相為終始大約因疳而成吐因吐而成瀉因瀉而成驚故小兒口內流涎乃疳之兆也起首即治疳而吐瀉之症不作又何致驚症之生也惟其失治疳症而胃氣受傷矣小兒純陽原無損于陰氣胃氣者傷陽氣也陽傷陰亦傷矣傷陰者傷脾氣也人生後天以脾胃之氣為主脾胃兩傷無氣以養心而驚之症起矣是驚乃虛病而非有外風之入也然則吐瀉驚俱脾胃之虛寒而疳乃脾胃之實熱也不知小兒因多食水菓以致口熱而成疳口熱似乎陽旺也然而陽

極則變為陰矣故疳症既久而作吐正陽變為陰之驗也可見
 驚疳吐瀉俱是虛症補脾胃而四病皆易愈也世醫分驚為風
 分疳為熱分吐瀉為寒亦未深知小兒之症耳孰知單治脾胃
 之虛而四症不必治而自愈也方用活兒丹人參三錢白朮一
 錢甘草一分茯苓二錢陳皮一分巴戟天一錢白芍一錢柴胡
 一分當歸五分山查五分神麩三分水煎服一劑而驚疳吐瀉
 無不即安二劑全愈三劑不再發也此方健脾胃開胃又能平肝
 使肝亦無鬱滯之患自能疏通土氣變尅土之肝反為益土之
 肝矣脾胃無非生氣而吐瀉自止何至四肢無養變成角弓反
 張之急慢驚風哉

一 小兒生疳上下牙床盡腫口角涼涎咳嗽不已咽喉腫痛人以
 為疳症脾熱也誰知是胃火之上升乎夫既是胃火宜用泄火

之藥瀉火而不效者以火過於盛將陽變為陰矣故用降火之
 藥以瀉火而火不降轉至困憊者正內經所謂壯火食氣也蓋
 少火宜瀉而壯火宜補不補胃以治火反瀉火以損胃安得而
 不加困憊哉治之法補其胃氣之虛少加息火之味則疳症不
 治而自愈矣方用平肝湯茯苓三錢白朮一錢陳皮二分神麩
 五分麥冬二錢元參二錢桔梗一錢蘇葉三分人參三分枳殼
 二分黃芩三分水煎服一劑輕二劑又輕三劑而疳症愈不必
 四劑也此方補胃以散火而火自平者以火出于土之中也土
 健而火藏土衰而火現故補其土而火藏于下又何至上升于
 口頰之間乎况方中有解火之味在于補之內則土引火而自
 歸火亦隨土而自息矣

小兒生疳之後飲茶水則吐後則不飲茶水而亦吐困弱之極

人以為熱吐也，誰知是熱變為寒而吐乎？夫疳症本熱也，疳久則寒者以胃土之傷，土衰則火旺，火旺則土亦衰，土益衰而前火之旺自滅，火土兩衰，安得不寒乎？况小兒最嘉者生冷也，土衰又加生冷，自然作吐矣。故止吐以健胃為主，單用止吐之藥，吾未見其能止也。即偶止吐于一時，未必不動吐于後日。惟健胃以止吐，則胃強而吐不再發也。方用六君子湯，加味用之人參一錢、白朮二錢、茯苓二錢、甘草一片、半夏五分、神麴三分、陳皮三分、白荳蔻一粒，水煎服。一劑即止吐，二劑全愈。此方健胃以止嘔，治大人尙有成功，况小兒乎？小兒嘔吐，世人視為輕症，往往不以意為變，成大病而不可救。以胃氣之傷不能生養，夫四肢而角弓反張之病現，乃陰虛而成之也。今以此方扶其胃氣，胃健而飲食能受，既無嘔吐之傷，自有灌注之益，又何至有

驚風之病哉

一 小兒大吐之後，忽然大瀉，雖吐止而瀉不肯止，倦怠之極，人以為吐變瀉，則其氣順矣。誰知其氣愈逆乎？夫吐乃傷胃而瀉乃傷脾也。氣順宜吐止而愈矣，今吐止而大瀉，乃胃傳於脾，由腑而入臟，是由表而入裏也。較吐更甚，蓋吐症補胃而可愈，而瀉症宜兼補脾。雖脾胃有同治之法，補胃自必補脾，但吐後作瀉，則補脾必須補胃也。方用生脾助胃湯，人參三錢、白朮三錢、甘草三分、肉桂一錢、茯苓五錢、神麴五分、附子一片，水煎服。劑而瀉止，二劑全愈。倘服之不應，不必治之矣。此方治小兒之瀉，效驗如響，百人中可救九十，彼不應者，乃陰陽兩絕之人也。非藥之過耳，世人見參附如酖毒，不敢浪用，醫生用之，亦輒抵毀，自陷於死亡哀哉。

一 小兒上吐下瀉，眼目上視，死亡頃刻，其狀宛似慢驚風，人以為驚風之症也。誰知是脾胃之氣將絕乎？小兒至此，亦人鬼之關也。若作慢風治之，用牛黃等丸，下喉即死矣。夫脾胃之氣將絕，是陰陽之氣欲脫也，非急救其氣，何能再活？救氣之藥，舍人參無第二味也。世間之藥，無過人參，至四五錢以救嬰兒之吐瀉，無論近人無此膽氣，即古人亦無此方法。毋怪嬰兒之多亡也。予逢異人，訓予救小兒垂危之症，惟有多用人參，可變危為安。鐸試之，無不奇效。蓋小兒脾胃虛寒，以致上吐下瀉，正至危之症也，宜多用人參以救之。方用安兒至寶湯，人參五錢，白朮五錢，茯苓三錢，巴戟天三錢，附子一錢，麥芽一錢，枳殼三分，檳榔三錢，車前子二錢，白荳蔻三錢，扁豆二錢，蘿蔔子一錢，水煎服。一劑即吐止，再劑瀉即止，三劑全愈。此方全在用參附之多，所

危以人參能回陽于既絕，附子能續陰于已亡也。然非羣藥佐之，則陰陽不能分清濁，而積穢亦不能祛除耳。故用參朮以補氣，少少祛除，自能奏功。否則烏可已傷而再傷，已絕而重絕乎？世人但尚祛除，全不識補中用攻之法，所以勞而無功也。

一 小兒吐瀉之後，角弓反張，時而驚悸，捧搐，人以為驚風之病也。誰知非風也，乃肝尅脾胃之土，而土氣欲絕耳。此時萬不可治風，一治風以定驚，則立刻亡矣。蓋既經吐瀉，則陰陽兩亡，所存者幾微之氣耳，不急救脾胃以續氣，反散風邪，以損其氣，欲不趨于陰得乎？且脾胃欲絕，補脾胃之土，而不補命門心包之火，則土寒而陽不可以遽回，陰不可以驟長，故必須補火以生土，補土以止驚。方用續氣湯，人參一兩，白朮一兩，巴戟天五錢，內桂一錢，生棗仁三錢，遠志二錢，茯苓五錢，乾薑三分，附子三分。

半夏一錢水煎服一劑安二劑更安三劑全愈此方以十歲爲準每歲減二分毋論慢驚急驚以此方投之無不立效蓋急慢驚風俱是虛症非急爲風而慢爲虛也世人以驚爲風悞矣不作風治則十人九活一作風治則十人十死以虛而兼風治則十人八死以大虛治而絕不治風則十人十活也喻嘉言謂驚風二字乃前人鑿空之談勸行醫者絕口不道其言雖過于憤激然亦深憫小兒之悞死于非命不得不大聲以救之也但喻嘉言所立之方尙兼風治猶未洞悉底裏不若直補土以救驚補火以生土也

一小兒驚症有慢驚急驚之分世以急驚屬之風慢驚屬之虛以此區別治療生者頗多似乎其說之不可易矣誰知似是而非亦殺人之說也蓋小兒從無有驚風之症此岐天師之所未定

而雷公之所不論者也驚風二字乃末世之醫創言以殺小兒者也自此言出殺小兒不啻數百萬矣小兒何嘗有風一作風治千人千死嗟乎天心仁愛何爲使小兒不識不知任其天蕩耶鐸授異人之教救小兒驚症絕不治風無論急驚慢驚以人參湯調服立刻奏功不敢自秘罄書竹簡以聽世人公用人參三兩白朮半觔茯苓三錢半夏一兩廣木香三錢柴胡一兩檳榔五錢荆芥炒黑五錢白芍三兩山查一兩枳殼一兩麥芽五錢神麴一兩甘草一兩乾薑一兩麥冬去心一兩石菖蒲五錢薄荷葉五錢各爲細末蜜丸如龍眼大凡遇急慢驚症用一丸以人參三錢煎湯泡開送下無不全活方名保赤定驚丹輕者一丸重則二丸無有不愈者也泡開必須用人參煎湯多多益善若不用人參效驗不能十分之捷然亦可免死亡之兆也願

世人共佩吾言，萬勿執驚症爲風症，忍爲殺人之醫也。

便蟲門

小兒便中下寸白蟲，或蜉蝣之蟲，或吐出長短之蟲，種種不一，人以爲濕熱之蟲也。誰知是脾胃之傷乎？小兒最喜食生冷之物，自然濕熱無疑，然而脾胃氣健，雖有濕熱，自易分消，惟是脾胃之氣傷，則難于運化，不生津液，而生虫矣。倘徒治虫而不補其脾胃，則脾氣不能消，胃氣不能化，虫且安居無恙矣。夫何益哉？惟補其脾胃之氣，則氣旺而自能治虫，再佐以殺虫之藥，虫將何隙以逃生乎？此治之法，必須補中用攻也。方用治虫丹，白朮三錢，茯苓三錢，白部一錢，檳榔五分，史君子十箇，枳殼五錢，白芍三錢，甘草三分，白薇二錢，黃連二分，半夏五分，水煎服，二劑而虫盡化爲水矣。但服藥之後，務須忌飲湯水茶茗，此方殺虫

之藥雖多，然入之健脾平肝之劑，內則正氣無傷，而虫又殺盡，乃兩得之道也。

小兒有糞門邊拖出長虫，不肯便下，又不肯進入，直腸之內，不痛不癢，人以爲虫口咬住也。誰知乃崇憑之乎？夫虫口咬住，必然作痛，今安然如故，豈虫口之自咬耶？虫既不咬，宜隨糞而俱下，今不下而留，半截于中，非崇憑而何病？既崇憑，宜非藥物可治，然而人有一念之悔心，醫卽有一種之治法，使人苟遷善而求醫無術，又何以見吾道之大哉？况父母未有不愛其子者，見其子生虫之異，未必不疑自身之譴尤，而畏鬼神之作祟，或告天而代爲請禱，或信佛而自訴祈求，然而醫無以應之，不幾阻人改過之門乎？鐸得異人之傳，用藥外點虫身，則立刻化爲水，方名點虬丹，水銀一錢，冰片一錢，硼砂一分，雄黃三分，樟腦一錢。

輕粉三分、白芷一錢、薄荷葉三分、各研絕細末、以不見水銀星為度、水調少許、點于頭或身上、少刻即盡化為水、但點藥之時、必虔拜上天、然後點之、則驗、否則或驗或不驗也、不須內服煎藥、至奇之方也、余恐負異人之傳、故聲書之、辯證論後、異人者、余遊南嶽所逢道士、自號雷公、狀貌殊異、傳鐸活人錄、奇方最多、此方其一也、

痘瘡門

小兒將出痘、身必發熱、口必發渴、眼必如醉、此時當以表藥散之、則火毒大解、無如世人未敢信為出痘、因循數日、見點而始用表散、有形之解、與無形之解、大有不同、所以輕變重、而重變死也、雖然見點不用表藥、則火毒又將安解、豈不藥得中醫、而可望其自愈乎、不知能善用表散之藥、正自有功耳、大約痘瘡初

出之時、不可不用表散之藥、而又不可全用表散、當于補中、表散之、則正氣無傷、而火毒又可盡解也、方用至慈湯、人參三分、荊芥炒黑二錢、生甘草一錢、柴胡一錢、當歸三錢、茯苓二錢、陳皮三分、麥冬二錢、元參三錢、天花粉一錢、水煎服、一劑火毒少除、二劑火毒全散、不必三劑也、若已見點、則重變輕、而死變生矣、此方正用柴胡、荊芥、以疏通其表裏、得元參以去其浮遊之火、得生甘草、以敗其毒、妙在人參、歸冬之類、俱是補氣補津之味、佐前藥以充其力、使無壅閉之憂、以速其至隱之火毒也、世人治痘、一見用補、無不驚懼、誰知火毒非補、萬不能由內而發于外、能于補中、用表散之法、何愁小兒之不盡登于壽考也、此方十歲為準、如週歲小兒、用十分之一、每歲增加可也、若十歲之外小兒、宜加人參而已、餘味不必加也、

一 小兒已出痘、遍身上下盡是鮮血點、粒粒可數、此至佳之痘也、不必發散、只須助其正氣、自然飽滿貫漿、收靨亦速、九日而始回矣、然而純用補劑、又慮呆補、而無疏通之氣、恐速于見功、未免升上、而不能降下、亦非治之善也、方用安幼湯、當歸三錢、荆芥一錢、元參三錢、陳皮三錢、熟地三錢、麥冬三錢、生甘草五分、生地二錢、黃連一分、丹皮一錢、貝母三分、水煎服、一劑而綻、不必二劑也、此方妙在補中帶散、則痘瘡力足、無內怯之憂、散中實補、則痘瘡大泄、少外阻之禍、世人不知治法、往往一味是補、所以多留後患耳、至于一味呆散、未有不將佳痘、而變爲惡瘡者、每至死亡、猶以爲胎毒之未盡、淨也、仍用散火敗毒之劑、以至不救、謂非醫殺之、而欲冀免于陰報、也得乎、幸人善用其方、以安幼耳、

一 小兒出痘、其痘瘡之色紅盛、煩渴、大便乾燥、小便短澀、而黃赤、脈洪大不倫、舌上生瘡、此陽症之瘡也、切忌用濕熱之味、然又不可見爲大熱、而卽用寒涼之藥、恐火熱太盛、驟得寒涼、而火不肯遽退、熱不肯驟解、反至生變者有之、治法宜用寒、而佐以化熱之品、用涼而輔以散火之味、則不違火熱之性、而自得寒涼之益也、方用全痘散、火湯、元參三錢、黃芩一錢、生甘草一錢、梔子一錢、桔梗二錢、生地二錢、荆芥三錢、炒黑當歸一錢、水煎服、一劑而熱毒火毒盡行解散矣、此方用苓梔以清火、又得元參以退其浮遊之火、更妙在用荆芥桔梗、引火外出、而生地當歸、滋其腑臟之燥、則雨潤風吹、有不變火宅而清涼者乎、所以獲解散之功、而無背違之失也、

一 小兒出痘、痘瘡虛空、而色又清白、發癢中癩、身寒顫、咬牙不已、

腹中虛脹上吐下瀉脉復沉細微弱此陰症之痘瘡也蓋內寒之極瘡不能發出必須用大補氣血之藥而佐以溫熱之味則瘡無冰凍之虞倘不知其故而亦用寒散之品則痘瘡內陷而死亡頃刻矣是陰痘戒用陰分之藥明甚然而其中有似是而非者又不可不辯以痘瘡之善變也色白虛也而發瘡又有實症身寒涼也而發顫又有熱症腹脹虛寒也而吐瀉又多實熱之症既非虛寒而亦用溫熱之品安得不死乎然則終何以辯之吾辯之于舌焉舌紅者熱舌白者寒也舌紅而帶白者熱中之寒舌白而微紅者寒中之熱舌大紅而又燥熱之極也舌純白而又滑寒之極也倘舌白而又滑此陰症無疑方用祛陰救痘丹人參一錢當歸三錢白朮三錢附子三分荆芥一錢黃芪三錢水煎服一劑而色白者即變為紅陽回而寒之氣盡散矣

此方用參芪歸朮以補氣血氣旺而陰自難留血足而陽自可復然後益之附子則奏功始神方中又加荆芥者以附子直攻其內非荆芥則不能引附子外散耳

一痘瘡初出隱於肌肉之間不見點粒人以為瘡毒之內藏而不肯遽出也孰知是氣虛而不能推送以發于外乎論理用升麻桔梗羌活之類亦能外發然而不補其氣而惟用散藥吾恐元氣益虛痘發之後未必無他病之生尚非治之善者也方用發痘散生黃芪二錢甘草五分當歸一錢桔梗一錢荆芥一錢防風二分水煎服一劑而點粒見再劑而痘盡出也可以不必再服藥矣此方之妙雖用桔梗荆芥防風之散藥而實得黃芪當歸補氣之力則易于推送所以火毒不能隱藏一齊而盡出也一痘瘡已見點後熱氣大盛瘡粒過多人以為火毒之太甚誰知

辨論金 卷之十四
是血虛而不能以潤乎。若止用發散之劑，而不用補血之藥，則火盛水乾，痘難貫漿矣。故必須于補血之中，而少佐之以解毒也。方用養痘湯，當歸二錢，川芎一錢，連翹五分，麥冬一錢，天花粉三分，木通三分，甘草二分，水煎服。一劑而熱退，二劑而瘡粒明淨，盡行貫漿矣。此方之妙，妙在當歸麥冬，川芎爲君，而少用連翹木通，天花粉爲佐使，則血旺而火不過炎，熱消而毒不內隱，故能速于收功，而又無後患也。

一痘瘡已出，四五日後，大小不等，根窠不甚紅澤，色暗頂陷，不能起發者，人以爲火毒之倒塌也。誰知是血氣之虧欠，欲出而不能，欲發而不得，倘徒用化毒之藥，則毒反不消，倘徒用催漿之藥，則漿反不貫，變生不測。往往有入于死亡者。治之法，必須于補氣之中，而輔以化毒催漿之味。方用催痘湯，人參三分，牛旁

子一錢，當歸二錢，川芎一錢，黃芪二錢，茯苓一錢，桔梗五分，陳皮二分，連翹三分，肉桂半分，水煎服。一劑而色紅，二劑而頂突貫漿矣。此方之妙，妙在用參芪歸芎之多，而發散化毒爲佐使，氣足而不祛于中，血足而不陷于內，自然痘色潤澤，而肥滿矣。一痘瘡至六日，毒宜化漿，宜行矣。乃顏色不紅，綻肥滿，是氣血大虛也。萬不可徒攻其火，而妄用敗毒之味也。必須以補氣補血爲主。方用護痘萬全湯，人參五分，黃芪一錢，當歸二錢，川芎一錢，白朮二錢，茯苓一錢，陳皮三分，牛旁子三分，桔梗五分，天花粉三分，水煎服。一劑紅潤而肥滿矣，不必二劑也。此方之妙，用全不去消毒攻火，但補氣血，而痘自外發，且補中有散，而補非呆補，更易奏功，所以有益無損，而收萬全之效也。

一痘瘡七八日，宜漿滿足矣。今瘡平漿薄，飲食少減，人以爲毒氣

之內陷也。誰知是氣血之不充乎。夫氣血之不充者。由于脾胃之氣弱也。脾胃氣弱。則肝血不生。肝血不生。則脾胃之氣更弱。又何能致漿足而瘡突哉。治之法。必須大補其脾胃之氣。而少佐之補血之品。氣血旺。而脾胃自健。脾胃健。而痘瘡安得不充。滿乎。方用保痘湯。人參一錢。白朮二錢。黃芪二錢。當歸二錢。麥冬二錢。陳皮五分。荆芥一錢。如癢加白芷三分。蟬蛻二分。不癢不必加也。如痘色白而薄。倍加參芪。一劑而白者。不白。薄者。不薄矣。此方純是補氣血。而補氣更重于補血者。以血得氣而易生也。氣足血旺。何愁漿薄哉。自然飲食倍增。漿老結靨矣。

一痘瘡至九日十日之後。漿稀痂薄。人以為痘毒之內蘊也。誰知仍是氣血之虧乎。夫氣虛補氣。血虛補血。又何礙乎。然而氣血雖虛。而痘毒未清。不兼顧火毒。一味呆補。則火毒內藏。亦恐痘

愈之後。有回毒之虞。必須於補中微散之。為得也。方用全痘湯。人參二錢。白朮二錢。牛旁子一錢。茯神三錢。陳皮三分。當歸三錢。通草一錢。甘草五分。荆芥一錢。金銀花三錢。水煎服。一劑而漿厚靨高矣。此方用人參。而不用黃芪者。以黃芪過于補氣。且恐有脹滿之虞。不若多人參。既補氣。而復無增悶之嫌耳。尤妙在用牛旁子。金銀花。于補中瀉毒。得補之益。而更獲散之利。真善後之妙法也。

一痘瘡至十一二日。身發潮熱。飲食不思。當靨不靨。痂落無托。人以為毒氣之猶存也。誰知是氣血之虛。而毒多未化乎。方用化痘仙丹。當歸三錢。白芍二錢。人參一錢。山查五粒。黃芪三錢。荆芥一錢。牛旁子一錢。防風三分。甘草一錢。金銀花三錢。水煎服。一劑而胃氣開。思飲食矣。二劑全愈。此方之妙。用金銀花與荆

芥牛旁子參芪歸芍之中，則胃氣不傷，脾氣大旺，氣血既潤，復不尅土，則火毒全解。又安有留餘之患。大凡痘瘡不補，則火毒不出，而痘瘡純補，則火毒亦不盡出也。今于補中用散，所以未出能出，而既出者盡出也。

一痘已見形，又出一層紅斑者，此夾疹痘也。或似斑而非斑，或零星錯雜，皆是夾疹之症。人以為痘毒之深，前未發出，而後再發也。誰知痘出之時，而又感寒風，使內熱留中，閉塞奏理，激動腑毒，而並出乎。治法宜臟腑並治。然治臟不若先治腑也。蓋痘毒出于臟，疹毒出于腑。臟之毒深，腑之毒淺。淺之毒先散，而深之毒亦自難留。故治痘須先治疹。方用分痘湯，升麻一錢，元參三錢，麥冬三錢，當歸二錢，青蒿二錢，生甘草二錢，半夏五分，生地三錢，荆芥一錢，水煎服。一劑而疹全散矣。此方退陽明之火，解

肺經之熱，妙在多用升麻，引火向外，發于皮毛。雖曰消疹，而實所以成痘也。又何必治疹之後，再去治痘哉。

一痘症雖發全，數日之後，身復發熱，遍身發出紅斑，癢甚，愈抓愈癢，先出大小不一，如粟米之狀，漸漸長大，如紅雲片，人以為痘毒之尚存，從前未經暢發，故如此。誰知是痘毒全無，乃收痂大愈之後，放心縱欲，飲食過傷，又兼風熱，而成之。此名為蓋痘疹，似痘而非痘也。治法散其風熱，而不必顧其痘毒。然風熱既解，即有毒亦無不共解矣。方用安痘湯，玄參五錢，當歸三錢，連翹一錢，白芍二錢，丹皮二錢，荆芥二錢，甘菊花二錢，升麻五分，天花粉一錢，水煎服。一劑而斑輕，再劑而斑盡散矣。此方化毒而不耗其氣，解熱而不損其血，所以風熱全消，而痘無變症耳。

一痘瘡五六日後，色變純黑，或炭灰之色，頭頂陷下不起，飲食到

口卽吐此死症無疑所謂壞症也世醫到此無不辭去然而死中可以求生勿以其壞症而輕棄之也蓋小兒純陽之氣易離而陰氣難絕倘有一線之陰可續則引陰以接陽往往死者可以重生而生者得以不死我受異傳何敢獨秘不共傳以救萬世之小兒乎方用起死救兒丹人參三錢元參一兩金銀花一兩白朮二錢當歸三錢麥冬三錢甘草一錢荆芥二錢天花粉二錢茯神三錢水煎服一劑黑變爲紅再劑而陷者起乾者潤飲食知味矣此方之妙全在用金銀花與立參之多既能解毒復善散火而又助之參朮歸冬則足以濟二味之力而益成其祛除之功所以能轉敗而爲勝起死而變生也萬勿驚其藥品之重與用參之多而減去其分兩蓋藥不重火毒難消參不多則陰陽難復矣願人加意於此方以救小兒于危險哉

小兒痘瘡治之不得法多至不救誰知痘瘡可以不治治之乎夫兒已生瘡何可聽其自生乎所謂不治治之者服吾藥可使之不生痘不必用藥以治痘也夫兒之生痘瘡者感父母之淫氣以生之也解其淫氣而又助之化毒之品安得而生痘哉前人亦知此意曾造稀痘丹或治截痘法然服之有驗有不驗者未能深窺痘毒之源與解毒之藥也蓋解毒之品未有不損人元氣者元氣一虛毒卽難解且毒成于火而清必用寒涼之藥但小兒脾胃最忌寒涼之藥一服寒涼土氣匱乏而火毒又能安外泄乎此所以服之而不効也鐸逢異人之傳方法平平而取效實竒方名止痘丹生甘草一錢金銀花三兩元參一兩貝母五分苦參三錢丹皮三錢黃芩二錢將七味擇天赦日用水二碗煎一碗不必兩煎將此一碗汁重湯又熬至三分用茯苓

五錢爲細末，將汁調爲丸，如米粒大，俟半週之時，將藥用蜜拌，與小兒食之，二日服完，必下黑糞，永不出痘矣。痘旣不生，何有死亡之痛哉。

疹症門 三則

一小兒發熱二三日，肌膚之間，隱隱發出紅點，如物影之搖動，時有時無者，此影疹也。人以爲發斑之傷寒也，誰料是出疹發表，熱毒外散，偶遇大寒，大風生冷之犯，故皮膚間塞，毒氣內收，壅住于腠理之間，其症皮膚之際，片片皆紅，或變白，白或轉紅，紅或轉紫，氣喘腹滿，甚而作痛，毒氣入臟，欲出不能，存亡頃刻，至危之病也。治之法，必須化斑，而不必治疹。蓋疹與斑，總皆熱毒耳。方用消斑化疹湯：元參五錢，歸尾三錢，石膏二錢，白芍五錢，地骨皮三錢，丹皮三錢，荆芥二錢，水通一錢，青蒿三錢，升麻一

錢，麥冬三錢，甘草一錢，水煎服。一劑而斑化疹散，二劑而消歸于無有矣。此方不多用大寒之品，止用微寒之味者，以疹斑之病，雖起于大熱，然亦因臟腑之乾燥，內無水制而外現也。今滋其津液，則水足以制火，又得引火解毒之藥，直走皮膚，火毒欲內攻而不可得，又安得不外泄而解散者乎。况方中用玄參爲君，原能清浮遊之火，何必又多用大寒藥，以撲滅其炎威，而傷臟腑，所以奏功旣神，而又無大害耳。

一小兒出疹，口中大渴，父母暢與之水，快甚，遂恣其酣飲，乃嘔吐不止，因變瀉痢，喘嗽不寧，小便不利，陰囊浮腫，脇痛筋軟，膨脹之症，生人以爲火熱之不解也。誰知飲水過多，水蓄不消之病乎。夫心火亢炎，因而作渴，飲水必入于心，心不受水，而傳于脾，爲嘔吐瀉痢矣。傳于肺爲咳嗽矣，傳于腎爲小便閉，而囊濕浮

腫矣。傳于肝，爲脇痛筋軟膨脹矣。夫水本尅火，然水多則滯，火反得水以滋其沸騰，疹消而他病生焉。治法不必治疹，而惟在於分消其水勢。水涸而疹亦痊矣。方用分水消疹散：茯苓三錢，車前子三錢，木通二錢，猪苓二錢，薏仁一兩，桔梗一錢，荆芥五分，白朮三分。水煎服。一劑水從小便出矣。連服二劑，水盡而愈。此方專治水也。止用桔梗、荆芥，以少提其氣，不特水氣因升提而下行倍速，且使餘疹亦從膀胱而下泄也。但二味既是提氣，何不用升麻提之？不知升麻提氣，必使疹毒由皮毛而出，反足以掣製利水之藥之肘。不若荆芥、桔梗，雖提氣而不走皮膚，反能佐二苓羣品，共走膀胱，水與疹而同治也。

小兒發疹之後，牙根潰爛，肉腐出血，臭穢冲鼻，人以為餘毒未盡，身上遊熱之不退也。誰知皆醫治疹而不治浮火之故，使熱積皮膚，不用解散清涼之劑，以致毒火入胃，久而不散，因作祟也。此等之病，必須仍散其火熱之毒，倘不知治法，縱兒恣食肥甘，濕熱動虫，勢必變爲走馬牙疳、穿腮落齒，或面頰浮腫，環日青黑，唇崩鼻壞，生瘡作癢，肉腐唇敗，而不可救者多矣。方用救疹散毒湯：玄參三錢，甘草五分，黃芩一錢，茯苓三錢，白朮十箇，白薇一錢，青蒿三錢，麥冬三錢，陳皮三分，荆芥五分，生地三錢，乾葛一錢。水煎服。一劑輕，二劑又輕，三劑全愈。此方乃和乾之味，而不用大涼之藥者，以疹病既愈，其勢雖盛，而火毒實輕，正不可以外證之重，而即用重瀉之味，以劫奪之也。世人一見此等之病，輕用苦寒瀉藥，往往輕變重，重變死，不可不慎。

喫泥門

小兒數歲後，好喫泥土，人謂胃氣熱也。誰知是肝木之旺耶？肝

木過旺來尅脾胃之土而土虛不能敵肝思得土以助脾胃故見泥土而思食也治之法平其肝木之旺補其脾胃之虛則土氣無虧自然見土而不嗜也方用六君子湯加減治之人參一錢茯苓三錢甘草五分陳皮五分半夏三分白朮五錢黃芩五分白芍五錢黃土三錢水煎服一劑而肝氣平二劑而脾胃之氣轉四劑不思食泥也此方原是健脾胃之聖藥加入黃芩以清肝火白芍以平肝肝平火清而脾胃自得其養矣尤妙加入黃土者借土氣以安脾投其所好而六君子湯諸藥益足以展其健運之功耳

胎毒門

一小兒生半歲或一二歲忽身上手足上肚腹上兩臂上或頭面上長成大瘡久變爲毒百藥治之而罔效者此非小兒之毒乃

父母之毒也當時結胎或感楊梅之惡氣及其坐胎之後或感淫氣之火邪遂至貽害於小兒治之不得其法半多死亡實可憫也吾遇異人之傳治胎毒小兒已數十人矣皆服之得生我不傳方不特失異人傳鐸之善心而且使小兒可救之病以不得吾方而失援則小兒之死不猶之鐸殺之乎鐸則何敢故寧傳世使世服方而嘆或有不效斷不可不傳使世之怨無力以救子也方用金銀花二兩生甘草三錢人參二錢天花粉二錢黃藥三錢錦地羅三錢水煎服二劑而毒全消倘外口不愈另有外治之方用蝸牛三錢生甘草三錢冰片一錢兒茶三錢輕粉一錢麝香三分樟腦三錢黃丹三錢水粉三錢枯礬三錢地龍糞五錢各研極細末以麻油調敷瘡口上不到數日自然瘡內生肉而瘡口外斂真神方也輕者用前方而不必用外治重

者內外合治無不速愈矣。鑠從萬世起見將此仙方輕易傳世願世人廣傳體鐸之心為心切勿自恃為奇隱而不傳以受天譴也。

辨證錄卷之十四終

鬼真君脉訣序

脉訣自王叔和傳後世鮮其人誰知叔和止註脉經誤傳有脉訣也叔和既無脉訣何傳訣而不傳經以脉經之多不及脉訣之約也然脉經始於高陽生非叔和原文也鐸遇雲中逸老於燕市傳法之脩而不傳脉經者以素問靈樞二書言脉之多也雖然於多之中而求其約安在必求脉於靈素哉鬼真君名史樞雲中逸老弟子也貌甚奇面長尺有一寸髮短而鬚深目鼻高耳垂下且大非凡近士也且岐天師脩傳方法何不傳脉於鐸因授是書皆切脉法也夫真君為天師之徒天師傳道之脩胡真君傳脉之約乎蓋病分臟腑若脉則傳臟而不及腑寧脉與病異哉不知病必兼臟而脉不可兼臟也靈素二書有時合而言之何今傳脉訣獨與病殊乎以臟病而腑亦病腑病而臟亦病故治臟而腑在其中切

臟而腑亦在其內、又何必合言之、所以單言臟而不及腑也、真君之傳、雖出於天師、亦真君之獨見也、傳止五篇、其言約矣、然皆言臟之文、治臟不可通之治腑哉、山陰陳士鐸敬之甫別號遠公題於文筆峯之小瑯琊

洞垣全書脈訣闡微

清 山陰 陳士鐸敬之甫著

大日本 長崎 淺井俊元民甫校

鬼史樞真君傳

第一篇

鬼真君曰、脈理甚微、原非一言可盡、人病多變、又豈一脈能包、論其陰陽、別其生死、察其臟腑、觀其症候、既上中下之宜分、必寸關尺之自定、左寸心左關肝、火木寧無至性、右寸肺右關脾、土金本有深情、惟兩尺爲腎、水火實難分、配中間是命、左右還可同觀、三焦別上中下以相診、餘經合寸關尺而其視、蓋部位烏容倒置、辨貴分明、而表裏何必細分、不宜拘執、雖按指以三部爲法、數息便悟、斷經顧看、脈以五臟爲主、知臟卽通治腑、察四令之節氣、春夏

別分一

異於秋冬，審一日之晷時，寅卯殊於申酉，大約逢剋則凶，逢生可救。我生則緩，我剋難醫，因五行而推斷，舉一隅而可知。弦似乎緊，濇似乎微，浮與芤相反，沉與伏寧殊。洪全實狀，弱帶濡形。辨之既清，病將安遁。故急則為痛，弦則為風，緊則為邪，緩則為虛，微則為冷，數則為熱，滑則痰多，濇則鬱塞，洪為火旺，大為血乾，沉為陰寒，遲為困乏，小者氣衰，細者血涸，浮者氣升，伏者脈結，芤多失血，實多壅氣，弱是陰虧，濡是濕犯，長是正氣之和，短是邪氣之尅，代為正氣之衰，革為正氣之脫，結為邪氣之搏，促為正氣之耗，動有變動之機，靜有安寧之喜，毛主火之將旺，石乃水之極沉，奕是力薄，堅是邪深，鈎為氣血之和，躁為氣血之燥，搏擊指而有太過之虞，散去指而無可留之狀，脈嫌其絕，脈貴其平，既知各脈之異同，可斷諸症之常變，然而診脈必須得時，要在日之平旦，按指原無異

法，貴取氣之甚清，自然虛實易明，盛衰易辨矣。

陳士鐸曰：脈理之不明也久矣，以致看病不真，用藥寡效，是脈之精微不可不講也。然而精微出於淺近，過求乎窈杳，反致失之。此鬼真君脈訣之妙，妙在淺近，使人人易知而深入也。

又曰：脈有陰陽之不同，王叔和分七表八裏，似乎切脈之分明，不知無一脈無陰陽，非浮為陽而沉為陰，遲為陰而數為陽也。陰中有陽，陽中有陰，於中消息全在臨症時察之，心可意會，非筆墨能繪畫耳。

又曰：十二經各有脈，分十二經看之，自然玄妙入神，然而過求其精，反失其約，蓋五臟之脈能統攝七腑，腑病治臟，臟安而腑自安，故脈訣止消言臟而不必言腑也。

又曰：切脈以呼吸為準，一呼脈二動，一吸脈二動，為是平人無

病之脈有餘不及皆病也。世人切脈多以三指齊按於寸關尺以候各脈焉。得脩觀其陰陽虛實邪正之分哉。必須先以一指觀其左寸後及左關又及左尺然後又及右寸又及右關又及右尺逐部分別再以三指準之則何異何同始了然於胸中見浮言其風見沉言其積見遲言其痛見數言其熱自能陰陽莫逃邪正有別虛實不淆矣。

又曰春夏秋冬長夏各有定脈內經已詳言之矣。春主弦也夏主鈎也鈎即微洪之意秋主毛也冬主石也長夏主稟弱也太過不及均是病徵尤不可見者尅我之脈也。如春宜弦而見毛夏宜鈎而見石及至秋冬未有不病者餘可類推矣。

又曰脈隨血而行而血隨時而運病脈行至尅我之脈則病必重行至生我之脈則病必輕蓋金脈逢金時必旺木脈逢金時

必衰故木病值當卯則木當其令逢申酉則木失其時觀寅卯申酉之旺衰即知金木之病情症候矣。即一木而可通之火土水金即寅卯申酉而可通之子午巳亥辰戌丑未也矣。

又曰臟腑之病雖各不同要不外五行之生尅逢生則病易愈也逢尅則病難痊也。我生則洩我之氣我尅則勞我之神臟腑為戰爭之地胸腹為角鬪之場敵則掃除而斬殺甚多傷損必過矣調停於生尅之間和解於敗亡之內仍於金木水火土而善用之也。

又曰脈有相似而實不相同者尤宜分辨蓋脈似相同而病實各異一經錯認死生反掌可不慎歟。

又曰脈之秘訣大約三十八字盡之而每字實有秘要非一言可盡也。既非一言可盡而鬼真君何以每一字皆用一言以

新語錄 卷之十五 脈訣 一
詔示天下、豈脉訣貴少而不貴多乎、不知訣不必太多、而論訣正不必太少也。

又曰、急則爲痛、言見急脉、卽爲痛病也、急似乎數、而未至於數也、急似乎緊、而未至於緊也、有不可緩之狀、乃氣與火相鬪、邪與正相戰也。

又曰、弦則爲風、弦乃春天之正脉、春天見弦脉、正風木之得令、非病也、苟見於夏秋季、則弦爲風矣。

又曰、緊則爲邪、邪者亦風之類、但風邪感之甚驟、則脉必現緊耳。

又曰、緩則爲虛、虛者重按之、不能鼓指也、鼓指亦非太勁之謂、言其不能微微鼓指耳、最宜活看。

又曰、微則爲冷、冷者寒也、不論何部、見微脉者、多是寒症。

又曰、數則爲熱、熱乃火病、火性炎上、其性最速、故數脉作熱論也、但數有不同、有陰數陽數之異、有初數久數之分、然而熱則一也。

又曰、滑則痰多、天下至滑者、無過於水、痰亦水也、水多則痰生、痰多則滑見宜也、然而水病不一、滑脉不常、何故單以痰多屬之滑也、不知水未結痰、其體靜、水既結痰、其體動也、動極則滑極、脉見滑矣、非痰多而何。

又曰、瀯則鬱塞、瀯脉乃往來之不甚舒暢也、此陰陽不和、氣血不達、外感於風寒、內阻於憂鬱、抑塞而不通、鬱而未發之狀、六部見此象、俱能成病、而尤於肝經不宜、一見瀯脉、卽以解鬱通塞之藥、急治之、則隨手見功也。

又曰、洪爲火旺、洪者來大而去數也、洪與大有分、按指若大、久

之而不見其大、止見其數、重按之不見其數、而仍見其大者、爲洪也、夏見此脈爲宜、否則皆火旺之極也。

又曰、大爲血乾、大者重按而仍洪也、火之有餘、乃血之不足、血不能制火、乃見大脈、在夏天則猶非大忌、然見大脈、卽宜補血、滋陰、以水伏火之、爲得耳。

又曰、沉爲陰寒、沉者至深之象、深則未有不陰、陰則未有不寒者也、入石洞而陰寒逼人者、正以其深沉耳。

作候一

又曰、遲爲困乏、遲者言候之、而不能進也、行百里者、半九十、非遲之之謂乎、是其力乏神困、欲進而不能、非可進而不肯進也。

又曰、小者氣衰、小脈言脈之小、而不能大也、氣不充之故耳。
又曰、細脈言脈之細、而不能粗也、江河細流、正水縮也、人身之血少、自然脈細矣。

又曰、浮脈指按卽得、氣舉而升之也。

又曰、伏脈指按、始終不可得、或隱隱約約、或有或無者、是邪氣搏結正氣、而不能出也、用藥出之者生、然出之驟亦非佳兆。

又曰、芤脈中空如無也、血失則內無血養、安得不中空乎。

又曰、實脈不獨按指有力、且有不可止抑之狀、非正氣之有餘、乃邪氣之有餘也、邪氣有餘、自然壅阻正氣矣。

又曰、弱脈不能強壯之狀、陰虛而不敢與陽氣相爭也。

又曰、濡脈言其濡滯也、濕則沾濡、非歟。

又曰、長脈之現、正氣之和也、有胃氣則脈自修長、有從容和緩之象。

又曰、短脈者、欲長而不能、欲速而不達、因邪氣尅犯正氣、正負而邪勝也。

又曰、代脉之現、正氣之衰、不得止以息其氣也、有痰氣之結、壅隔不散、亦現代脉者、然正氣不衰、痰安能作祟、使脉中止、而不還乎、

又曰、革脉來渾渾而濁亂、至擊指者、是蓋正氣之欲脫也、

又曰、結脉其來則緩、而時又現止、是力不能不止也、明是正氣甚衰、不敢與邪氣相鬪、邪氣搏結於一身耳、

又曰、促脉急遽之狀、氣耗而勢難寬舒也、

又曰、動脉有不能安靜之勢、動極生變也、

又曰、靜脉與動相反、不動則不變、自享寧靜之福矣、

又曰、毛脉言如羽毛之拂體、乃有餘之象、火將浮而又息之狀、夏秋之間之正脉也、在夏則生氣之旺也、在秋則旺氣之衰也、在他時則熱氣之盛也、宜於活看、

又曰、石脉乃沉脉之至、藏之極也、冬時正脉、餘時見之、為寒冷矣、

又曰、奕脉不能剛健之狀、明是力之不勝耳、

又曰、堅脉至硬之狀、邪氣深入、牢不可破也、

又曰、鈞脉洪而不大之象、如鈞之有留也、乃胃脉和平、火不盛而司其令、夏日見之、尤為平脉也、

又曰、躁脉似動而非動、似數而非數、似促而非促、似急而非急也、若有乾枯煩擾之狀、

又曰、搏脉者、擊指之謂也、各脉皆能擊指、俱屬太過、

又曰、散脉者、即解索之兆、乃欲留而不能留、欲存而不能存也、

又曰、絕脉者、言脉之將斷而未斷、可續而不續也、死亡之時、必現此脉、

又曰、平脉者、言各脉之得其平也、如浮不甚浮、沉不甚沉、遲不

甚遲、數不甚數耳、人現平脈、多是胃氣之全也、胃氣無傷、又寧有疾病哉、此脈之所以貴得平耳、

又曰、鬼真君脈訣、止得三十八字、然而人之疾病、已盡括於其內、要在辨其異中之同、與同中之異、則因常可以通變、遇變可以常用、隨時隨地、隨症隨人、無不可起死以回生矣、又何必拘拘於日之平且、乘人之清氣、診脈治病哉、

又曰、五臟七腑、各有脈、俱在寸關尺、觀之內經、分三部之內外、前後上下、以細察其部位、何其詳也、而鬼真君獨重五臟、將七腑畧而不言、止將三焦命門、以示世、又皆不專屬之於腎、何其畧也、不知臟可以包腑、而腑不可以包臟、論腑太詳、必至反遺夫臟矣、不若專言五臟治臟、而治腑在其中矣、三焦乃腑之一、何獨舉而言之、因世錯認三焦、在於腎中、故特指明也、命門爲

十二經之主、世人不知、而以右尺觀之、恐失命主之義、故鬼真君辨明之也、

又曰、或疑王叔和脈訣、因遺落心包、遂至傳疑千載、今鬼真君之訣、將七府全然不講、不更滋甚乎、然而切脈止可切五臟也、七腑部位、內經雖分、似乎有一定之理、而究難別臟腑之異、不若單切五臟、論其五行之生尅、病情反無可遁也、此鬼真君不言七腑、真是至捷之法、亦是至玄之機、幸勿作王叔和遺落心包一例、而並譏之也、

又曰、脈貴知微、然而得其微、又甚難也、暗中摸索、而欲使臟腑之疾病、瞭然手指之間、易乎不易乎、雖然切脈必須問症、症是腑病、卽以臟之脈合之、臟之脈不病、便是腑病也、治腑而病可愈矣、症是臟病、亦以臟之脈合之、臟之脈病、是非腑病也、治臟

而病亦愈矣。苟知此法，又何微之不可得哉。

又曰：凡人之脈，多不相同，不可以此人之脈，槩論諸彼人也。看一人之脈，當取其左右兩手之各脈，一一而消息之，辨其何部獨異，乃斷何經之病，庶幾得之。

又曰：看脈，須看有神無神，實是秘訣。而有神無神，何以別之？無論浮沉遲數，瀦滑大小之各脈，按指之下，若有條理，先後秩然不亂者，此有神之至也。若按指而充然有力者，有神之次也。其餘按指而微微鼓動者，亦謂有神。倘按之而散亂者，或有或無者，或來有力而去無力者，或輕按有而重按絕無者，或時而續時而斷者，或欲續而不能，或欲接而不得，或沉細之中，倏有依稀之狀，或洪大之內，忽有飄渺之形，皆是無神之脈。脈至無神，卽爲可畏，當用大補之劑急救之。倘因循等待，必變爲死脈，而

後救之晚矣。

又曰：人有天生細微之脈，不可動，曰虛弱。當統六部同觀之。倘一脈獨旺，一脈獨急，餘脈皆現細微，此非虛弱之脈也。旺乃火盛而急，乃邪侵也。以此消息，斷然不差。

又曰：切脈貴先調息。吾息調而後可以察病人之息。蓋病人之息，呼吸不到，未有能調者也。倘醫者之息不平，又何以知病人之息哉。故學醫者，平日學導引之法，則呼吸之間，無太過不及，自然下指之時，息數分明，可以察病人之脈也。

又曰：看脈必須看症。蓋症所以印證夫脈也。夫人之脈不同，有天生陰脈而不現之於皮毛之內，又將何處看脈。故必觀其症候之若何，而症候正難辨也。或者其起居之靜躁，靜爲陰，而躁爲陽也。看其飲食之寒熱，喜寒爲熱，而喜熱爲寒也。問其大小

便之燥濕短長燥短爲實而濕長爲虛也辨其口舌之黃白滑滑黃峭爲邪盛而白滑爲正衰也是觀症所以濟切脉之窮而切脉所以輔觀症之妙耳

第二篇

鬼真君曰人身之病變遷原非一致人身之脉紛紜必有殊形故六部之中每顯各異之狀一經之內常呈兼見之端浮而弦浮而數多無定象沉而細沉而遲不少同觀必須統論其精微始可獨斷其真偽故浮而兼滑也必是風痰之盛浮而兼大也決爲氣血之邪浮而兼遲也虛風之害浮而兼濡也濕氣之侵浮而兼細也血隨氣而上升浮而兼洪也火得氣而更旺浮而兼芤定爲血泛之虞浮而兼緊決至邪重之苦浮而兼急必疼痛於上焦浮而兼弱必委靡於下部浮而兼長氣雖升而不傷其正浮而兼短氣欲

濕言作潑

結而難散其邪浮而兼結邪搏於經絡之間浮而兼革正脫於臟腑之內浮而兼代邪居於胸膈之處浮而兼促正傷於營衛之中浮而兼動氣有變遷浮而兼靜氣將寧息浮而兼毛氣得火而上騰於頭目浮而兼躁火因氣而上炎於咽喉浮而兼鈎氣升之和浮而兼搏氣浮之極浮而兼爽氣虛之甚浮而兼散氣不可收浮而兼平氣乃無病○沉而兼遲也寒虛之至沉而兼濕也鬱滯之深沉而兼滑也寒痰之不舒沉而兼小也冷氣之難發沉而兼實也氣得寒而不揚沉而兼微也精因冷而欲脫沉而兼細也血逢陰凝之象沉而兼緊也邪乘寒冷之徵沉而兼急小腹有寒邪之痛沉而兼濡兩足多水脹之侵沉而兼長氣陷而正尚未傷沉而兼短精冷而邪將不換沉而兼結邪搏於至陰沉而兼革正脫於髓海沉而兼代命門將絕而可危沉而兼促元陽欲脫而可畏沉

濕當作溼

而兼靜陽寒能守沉而兼石陰固不遷沉而兼奕腹冷有痛楚之苦沉而兼散精寒有涸絕之危○更有濡遲兼見無非濕犯乎虛濡滑同來尤是痰成乎水濡中兼大濕因血耗以相侵濡中兼小水趨氣衰以相犯濡而兼弦風水之患深濡而兼芤痰血之症急濡而兼長水濕易散濡而兼革水濕難消濡而兼動水有泛濫之盛濡而兼靜濕多浸潤之微濡而兼奕水邪乘虛而相生濡而兼散正氣隨濕而欲脫○遲而兼濇鬱中以成弱遲而兼滑濕內以招虛遲而兼大氣血皆居乾燥遲而兼小精神必至伶仃遲而兼微虛寒之氣遲而兼細匱乏之身遲而兼弦內傷之風遲而兼芤內傷之血遲而兼長病不足畏遲而兼短症實可愁遲而兼代必至損傷脾胃遲而兼革定然渙散精華遲而兼石氣寒將侵於骨遲而兼奕血衰少養乎心遲而兼散寒極而氣飛遲而兼靜陰微

而精固○數而兼滑亢炎之痰數而兼大沸騰之火數而兼實氣壅於熱數而兼弦火助乎風數而兼洪熱有燎原之盛數而兼緊邪有烽火之傳數而兼芤吐血何狂數而兼代喪軀必速數而兼革走陽可許數而兼促消正堪憂數而兼動恐有發狂之變數而兼毛定多消渴之成數而兼搏火刑金而喉舌無津數而兼躁火燒心而脾胃生焰○濇中兼小氣血虧而鬱志莫伸濇中兼實氣血壅而思想難遂濇中兼微氣寒而滯濇中兼細血少而愁濇中兼洪鬱怒不解濇中兼急鬱痛安禁濇中兼結邪搏於兩脇之間濇中兼促正虧於半表之際濇中兼革氣欲脫於腎肝濇中兼代氣將絕於脾胃濇中兼石寒鬱不宣濇中兼堅風鬱難出濇中兼搏鬱甚莫解濇中兼靜鬱極安移○滑而兼大痰借血以為災滑而兼小痰借氣而作祟滑而兼實氣塞於痰中滑而兼微痰冷於

辨諸金 卷之二十五 脈言醫術
胸次滑而兼細、痰旺而血枯、滑而兼弦、水盛而風急、滑而兼洪、濕熱成黨、滑而兼乳、痰血爲疔、滑而兼緊、邪得濕以助威、滑而兼急、邪乘濕而增痛、滑而兼濡、濕盛恐邪氣之漆脹、滑而兼革、水多防正氣之難收、滑而兼動、水畜致腸腹之鳴、滑而兼毛、火沸召痰涎之吐、滑而兼爽、濕痰積而不消、滑而兼堅、濕邪留而不散、滑而兼搏、痰有傾盆之嘔、滑而兼散、水如走石之崩、餘脈俱可類推、各經正當細晰、總以脾胃之氣爲要、更以平緩之脈爲先、倘下指之時、均有寧靜之致、庶幾藥餌之用、可許康健之祥矣。

陳士鐸曰、凡人之病、變遷不常、而脈亦因病殊形、必非一狀、大約一經之中、必兼二脈、以相見也、合二脈以論症、而症始出焉、合二脈以用藥、而藥始當焉、但二脈兼見甚多、不止浮沉遲數、澹滑濡也、然苟知兼見之大旨、則以七脈爲綱、以餘脈爲紀、又

何病之不可推測哉。

又曰、脈有同中之異、亦有異中之同、同是浮脈、而何以有各脈之異、同是沉脈、而何以有各脈之殊、蓋脈無一定之形、必兼二脈而並見也、兩脈既然並見、合兩脈以治一病、自易見功、然而兩脈之現、必察其同異、知其同中之異、竟治其異、而不必顧其同、知其異中之同、竟治其同、而不必顧其異、從此消息、醫道烏得不神哉。

又曰、千態萬狀者病也、千變萬化者脈也、鬼真君以三十八字盡脈之理、毋乃太簡乎、故又取兼見之脈、以示世、似乎克盡其變矣、然而兼見之脈、止取浮沉遲數澹滑濡之七脈、而其餘三十一脈、不言兼見、或疑其訣之不全、而立法之未善也、不知脈之大綱、而浮沉遲數澹滑之六字耳、舉其大綱、而餘可類推、又

何必瑣細之盡告哉。吾意於浮沉遲數濇滑之外，引濡脈之兼見者，亦可無事重宣耳。鬼真君惟恐人之拘執而不通也，故畧舉一濡脈以訓世耳。

又曰：兼見之脈，須先看七脈為主，既得七脈，而後辨其兼見之形，則同中之異，與異中之同，無難細得也。以七脈為綱，以兼見為緯，實切脈之權輿也。

又曰：切脈實難，而辨其異同，不尤難乎？然而無難也。知浮沉遲數濇滑濡之七脈，而其餘三十一脈，兼而察之，則其病可意會也。况鬼真君又明告之乎？細讀此訣，亦何患脈之難知，而病之難識哉。

又曰：人疑兼見之脈，不止鬼真君所示寥寥數語，恐不足以包萬病也。殊不知脈訣言愈多，而脈愈晦，鬼真君之訣妙在於少也。

以少勝多，非便世人之習誦也。實其脈訣神奇，足以包舉萬病耳。又曰：脈理細微，須辨其同中之異，異中之同，同中之異者，如同是浮脈，何以有大小虛實之異也？如同是沉脈，何以有遲數濇滑之異也？異中之同者，如寸關尺各現大小虛實之異，而浮脈則同也；上中下各現遲數濇滑之異，而沉脈則同也。知其同中之異，則竟治其異；知其異中之同，則不必治其同。於此消息，何患脈理之不精哉。

第三篇

鬼真君曰：五臟之病，必以寸關尺為憑，七腑之症，亦以寸關尺為據。然不分晰其精微，又何能盡知其玄妙？試觀其寸口也。左寸見浮，風熱上越而頭疼；右寸見浮，咽喉中燥而鼻塞；左寸見芤，胸難藏血而嘔吐；右寸見芤，胃多瘀血而痛疼；左寸見滑，熱痰入心而

舌強右寸見滑熱痰侵肺而皮折左寸見實火焚心而面赤右寸見實火生胃而唾乾左寸見弦風入體必多頭痛右寸見弦風入腸定有筋攣左寸見緊邪盛而心痛右寸見緊氣嗽而肺傷左寸見洪心胸起熱悶之燒右寸見洪頭腦生炎蒸之楚左寸見微心寒而虛弱何辭右寸見微氣冷而崩陷難免左寸見沉心君失相火之助右寸見沉肺金召寒氣之侵左寸見濇心脉火鬱而未舒右寸見濇肺金鬱而莫達左寸見遲膈中虛乏而難以衛心右寸見遲上焦損傷而難以生氣左寸見伏氣匿於脇間右寸見伏氣積於腕內左寸見濡膀胱水畜而不消右寸見濡皮毛汗泄而未止左寸見弱無血以養心右寸見弱乏氣以生胃左寸見火心經血燥而怔忡右寸見大肺經血乾而閉結左寸見小驚悸時生右寸見小怯弱日甚左寸見虛心中恍惚右寸見虛胃內衰微左

寸見細運行乏力右寸見細言語無神左寸見微包絡有寒邪之入右寸見微胸腕有陰氣之招左寸見急心疼不免右寸見急喉痛安辭左寸見短三焦之氣自快右寸見短再宿之食難消左寸見代心痛勿訝右寸見代痰塞何妨左寸見結邪搏於心包右寸見結邪蟠於胃腕左寸見促積聚有煩悶之苦右寸見促留滯與痞滿之憂左寸見革心氣散漫而不收右寸見革肺氣飛越而不返左寸見動歡娛姪子之祥右寸見動飲食傷氣之兆左寸見毛心火動而將刑肺金右寸見毛肺火起而將尅肝木左寸見鉤心氣安而夢魂適右寸見鉤肺氣肅而膀胱通左寸見堅邪犯心而呼號右寸見堅邪侵肺而咳嗽左寸見躁無血養神右寸見躁無精定魄左寸見搏火太過而焚心右寸見搏火太過而燥肺左寸見石陰寒直搗於膈中右寸見石冷氣逼居於腕內左寸見散心

辨諸論
有無可奈何之象、右寸見散、肺有但出無入之悲。○試觀其關中
也、左關見浮、肝犯風而眼赤、右關見浮、胃入風而渴生、左關見扎
必肝傷而失血、右關見扎、必腸毒而便膿、左關見滑、頭目腫痛堪
嗟、右關見滑、脾胃熱焚甚苦、左關見實、痰癖可徵、右關見實、心腹
多痛、左關見弦、肝旺生風、右關見弦、脾崩不食、左關見緊、筋脉急
拘、右關見緊、嘈雜嘔吐、左關見洪、眼目生花、右關見洪、心腹結痛
左關見沉、必陰寒之癖積、右關見沉、定冷氣之難安、左關見濇、風
邪寒閉、因氣鬱而有餘、右關見濇、飲食傷殘、實血虛之不足、左關
見遲、兩脇多寒、右關見遲、中焦微冷、左關見伏、關格收藏、右關見
伏、霍亂吐瀉、左關見濡、痺症將成、右關見濡、水臌可畏、左關見弱
筋痿宜防、右關見弱、氣短須補、左關見數、肝火盛而目紅、右關見
數、胃火旺而口渴、左關見大、怒氣傷肝、右關見大、狂陽傷胃、左關

見小、肝胆氣衰、右關見小、脾胃血少、左關見虛、必益其血、右關見
虛、須補其津、左關見微、溫其下元之愆、右關見微、煖其氣海之寒
左關見細、慮腳膝之痿、右關見細、恐肚腹之瀉、左關見急、肝痛而
不能眠、右關見急、脾傷而自難臥、左關見代、肝絕而痛則無妨、右
關見代、肝絕而安則無救、左關見結、胸滿而痰結於中、右關見結
脾傷而滯氣於下、左關見促、肝無腎水之滋、右關見促、脾無腎火
之養、左關見革、氣脫於木旺之時、右關見革、氣脫於土崩之候、左
關見動、兩脇有氣痛之愁、右關見動、中焦有火焚之懼、左關見毛
肝木旺而生風、右關見毛、胃土盛而動火、左關見奕、無病之人、右
關見奕、加粲之客、左關見鈎、肝血之足、右關見鈎、脾氣之安、左關
見靜、優遊享無事之福、右關見靜、舒暢享強食之愉、左關見石、筋
得寒而拘攣、右關見石、胃因冷而泄瀉、左關見堅、邪必留戀於經

絡右關見堅邪必會聚於臟腑左關見燥必苦血乾而多怒右關見燥必苦液涸而善嘔左關見搏防太盛之中風右關見搏慮過旺之狂病左關見散筋弛而不能收右關見散肢解而不可舉○試觀其尺下也浮見尺左水虧而雙耳齊聾浮見尺右火旺而大腸自秘芤見尺左小遺多膿血之災芤見尺右大便下赤紅之歎滑見尺左水入腰而作楚滑見尺右痰流足以成痺實見尺左膀胱水閉而不通實見尺右溺瀝火澁而難出弦見尺左腰腹重滯生疼弦見尺右腎臟風邪作耗緊見尺左耳似蟬鳴緊見尺右臍同虫咬洪見尺左水熬乾而消渴洪見尺右火炎上而夢遺微見尺左盜汗淋漓微見尺右腸鳴泄瀉沉見尺左精冷如冰沉見尺右腰寒若水濇見尺左陰寒疝結濇見尺右逆冷腸崩遲見尺左下焦寒冷遲見尺右小腹陰凝伏見尺左陽氣不升伏見尺右陰

氣更閉濡見尺左寒濕侵骨濡見尺右冷痿中腰弱見尺左雙足骨痠弱見尺右兩腿氣乏大見尺左腎涸於遺精大見尺右命瀆於作用小見尺左水耗無多小見尺右火衰不旺虛見尺左心腎不交虛見尺右水火皆乏微見尺左冷入關元微見尺右寒通腹裏細見尺左髓冷脛枯細見尺右命寒精洩數見尺左水少而火沸為痰數見尺右火炎而水隨作喘急見尺左痛入陰丸急見尺右疼漆小腹短見尺左自無延齡之福短見尺右定含怯戰之羞代見尺左精敗欲絕代見尺右火熄將亡結見尺左邪襲水而不散結見尺右邪乘火而不離促見尺左髓耗而足難行步促見尺右火衰而氣不通心革見尺左玉關不閉革見尺右河車俱焚動見尺左定然魂夢多遺動見尺右定然陽強不倒毛見尺左精耗而龍火將興毛見尺右焰騰而命門自熱奕見尺左腎弱相宜奕

辨諸金 卷之十五 脈診圖 〇十六
見尺右、火衰當助、鈎見尺左、陰平之士、鈎見尺右、陽秘之徒、靜見尺左、閉關可信、靜見尺右、守真無疑、石見尺左、精無傾失之慨、石見尺右、陽有退藏之慶、堅見尺左、邪入於骨髓、堅見尺右、邪居於腰膝、躁見尺左、腎難上交於心、躁見尺右、陽且高越於鬲、搏見尺左、膀胱越熱閉之淋、搏見尺右、咽喉長瘡蛾之腫、散見尺左、腎水欲絕於須臾、散見尺右、元陽將逃於頃刻、此皆六部之端主、亦卽各脈之旁通、然而各脈之中、緩急爲要、六部之內、長脈爲宗、脈長而命根深、脈緩而胃氣在、故上中下必取其緩、而寸關尺必尚其長也。

陳士鐸曰、脈有兼見以觀其變、必有獨現以顯其常、常變之道、不可不分觀之也、鬼真君先言其變、示變之宜知也、再言其常、示常之宜諳也、知常而後達變、又寧至有治常之失哉。

又曰、脈不分觀部位、則病情不可得而知、此寸關尺、必須分觀其脈也。

又曰、脈有寸關尺、無脈而脈見於列缺之間者、世人以爲反關脈也、此乃經脈虛、而絡脈盛也、經脈虛、故不現於寸關尺之三部、絡脈盛、故現於列缺之間、蓋直行爲經、而旁出爲絡、列缺正絡脈之穴也、在兩手交叉食指盡處、兩筋骨罅中、屬肺經之絡、別走陽明之絡也、此中原有動脈、宜細動而不宜大動、今寸關尺三部無脈、而此處之脈大動、亦現三部之象、是陽勝於陰也、千金翼謂陽脈逆反大於寸口三絡、正謂反關脈也、亦當分觀其動、以別疾病耳。

又曰、寸關尺、分上中下也、心肺居上、而以寸觀之象天也、肝脾居中、而以關觀之象人也、腎居下、而以尺觀之象地也、醫道必

合天地人以論醫則醫無剩義脉訣亦必合天地人以示法則法無遁情非好作廣大之語也實有不如此則其法爲不脩耳又曰寸關尺分上中下切之是矣然其中有上而兼中者有中而兼下者有中而兼上下者又不可不知之也如寸脉浮而連於關關脉數而連於尺如關脉大而連於寸尺者是也此又當合寸關尺而同觀又不可專主於寸而不及關專主於關而不及寸尺又在臨症切脉而變通之也

又曰脉宜分觀以別虛實然又有合寸關尺以分虛實者大約左之寸關尺齊旺者乃外感居多右之寸關尺齊旺者乃內傷居多非單左寸旺爲外感右寸旺爲內傷也

又曰寸關尺分觀之後又宜合觀不分觀不知其細不合觀不得其和故分觀之時當以一指切其脉合觀之時又當以三指

切其脉也

又曰看寸關尺三部之脉先切關脉而後看寸脉由寸脉而後看尺脉左右相同

又曰今人看脉男先看左女先看右男女之脉何常有異正不必如此拘拘也

又曰凡人脉貴有胃氣胃氣者平氣也毋論寸關尺下指之時覺有平和之象卽是有胃氣也非獨右關平和始有胃氣耳

又曰脾與胃爲表裏胃病則脾必病脾病則胃亦病病安有胃氣哉故脾脉與胃脉同觀所以脾胃之脉皆在右關切之耳

又曰胃旺而脉愈微胃衰而脉愈盛故右關太旺反是胃氣之虛也然而右關之旺又由於左關之旺也左關旺而右關不能衰此本來尅土之象又不可不知之也

又曰、三部之脈、前人以尺脈為根、似乎切脈重在尺也、不知本實先撥、固然枝葉難榮、然而過於摧殘、如狂風大雨、拔木折枝、根亦隨竭、此脈所以必統三部、而分觀之也。

又曰、寸關尺各有內外之分、尺外尺裏、關外關裏、寸外寸裏、皆從左右、以分內外、而非上下、以分內外也、余註內經、已詳哉言之矣、而鬼真君不言及此者、蓋舉其要而示人耳。

又曰、脈分三部、上寸也、中關也、下尺也、寸之內又分左右、左寸候心、而包絡膻中統其內、左寸候肺、而胸膈咽喉統其內、關之內又分左右、左關候肝、而膽脇膈則統其內、右關候脾、而胃則統其內、尺之內又分左右、左尺候腎之水、而小腸膀胱小腹股膝統其內、右尺候腎之火、而大腸腰脛跗統其內、三焦有上焦中焦下焦之異、上焦屬於寸、中焦屬於關、下焦屬於尺、不可

腰脛之間失一字

於右腎候之也、命門為十二經之主、不屬於右腎、而不得不候之於右腎也、部位既明、切脈自無疑。

又曰、鬼真君所分之部位、一皆準於內經、與王叔和所定大相懸殊、世人見之、未有不驚異者也、然而鬼真君正恐人驚異、單言五臟、而不言七腑、鐸慮部位不明、又將何以診脈、故於前條細列以問世、第推鬼真君之意、但知五臟之脈、正不必又及七腑之脈也、鐸重言之、似乎饒舌矣。

又曰、五臟各有表裏、心則與小腸為表裏也、肝則與胆為表裏也、肺則與大腸為表裏也、脾則與胃為表裏也、腎則與膀胱為表裏也、表病則裏病、原相關切、故治裏正所以治表也、何必分表是表、而不屬之於臟、裏是裏、而不屬之於腑哉。

第四篇

鬼真君曰診脈宜分生死決日當定時辰傷寒熱病洪大生而沉細死產後熱病緩滑吉而弦急凶頭痛之病生於浮滑而死於短濇腹脹之症死於虛小而生於大浮下痢活於微小浮洪反有難療之嘆癲狂全於實大沉細轉興莫救之憂消渴數大有生機虛小愁其陰盡霍亂浮洪無死法微遲慮彼陽亡中風最喜遲浮急實者何能起死中惡偏宜緊細浮大者不易回生心疼沉細非比浮大之難醫水氣大浮不似沉細之莫療吐血鼻衄沉弱沉細者生實大浮大俱為亡兆中毒腸辟洪大滑大者吉微細滑細各是危徵喘急宜浮滑短濇云亡咳嗽尚浮濡沉伏決斃久瀉反宜微細浮洪者多致歸陰新產切忌大弦緩滑者寧憂辭世嘔吐虛細者吉實大則艱於奏功癆瘵浮滑者佳細數則難以取效盜汗惟嫌緊數虛小無愁失血止慮浮洪細弱可喜內實者吉在浮洪沉

細有變遷之禍內虛者吉在沉細浮大無存活之祥痺症尤嫌浮大細濇長延厥病更忌緊弦洪數即解癥瘕見細微而可喜弦滑者危眩暈見浮滑而相宜沉濇者重黃疸不宜急數遲滑易於分消白淋偏貴濡遲濇弱艱於止遏便閉生於微細洪大有陰盡之傷發汗生於虛小弦洪有陽亡之失腹痛沉伏多入泉臺脅痛乳大定趨死路脫症結代難留人世喘症促革易走冥途關格濇伏常登鬼籙癰疽滑大轉慶生緣結胸現沉緊半寄於死亡臟結現浮滑速痊於淹滯直中陰經喪淪代結忽成熟病全活浮洪發斑洪大未是死徵噎隔數細實非生氣偏枯之症弦滑何愁歪斜之病數大可治噤口之痢結濇不易療中暑之症沉伏不須驚循衣摸床細小尤堪救援遺尿撒手促革必至喪捐筋青囊縮微短殞歿舌黑髮直數大焦枯臍突唇裂結代應歿口張足腫短促何延

呃逆不止、短散就木、懊懣無休、微弱加餐、血暈散促、頃刻歸陰、腸結搏堅、旦夕歌露。○更有帶鉤之象、心死可定於九日、彈石之狀、腎死必絕於七朝、弓弦之張、肝死定亡於十八、釜沸之亂、脾死可決於四三、浮水之景、肺死應喪於十二也。尚有秘法、可以罄傳於萬年、如見前形、不必問現於何臟、見蝦遊而斷八日之必死、見雀啄而決七日之必亡、見吹毛而言四日之必危、見奪索而許一日之必逝、見屋漏而定五日之必隕、其餘死亡、可據推斷。

陳士鐸曰：死亡之脈、不盡於此、然而得此、正易決存亡也。

又曰：素問靈樞載死亡之脈甚條、二書參觀、更無差錯。

又曰：死亡之脈、全在看脈之有神無神、有神者有胃氣也、無神者無胃氣也、故有胃氣、雖現死脈而可生、無胃氣、即現生脈而必死、又在臨症而消息之也。

又曰：脈現死亡、不可輕斷死期、往往有用藥得宜、雖不能起死為生、然延留數日、亦其常也、訣中篇末、有決日之法、愚以為終非定論、但斷其必死、而不必先定其日期、當與高明共商之。又曰：死亡之脈、現之於驟者、易救、以臟腑初絕、尚有根可接也。倘時日已久、雖有人參、又何以生之於無何有之鄉哉、有無可如何者矣。

又曰：脈有細微欲絕者、多是死亡之脈、然脈有伏而不出、狀似細微欲絕、其實絕而未絕也、一出脈而細微之象如失、此等之脈、最難辨別、又當合症而參觀之、未可全恃夫切脈也。

又曰：脈有生死之各別、如魚遊雀啄之類、彈石解索屋漏水流吹毛之狀、自是死脈無疑、見此等之脈、即可決其必亡、苟無此等之現、似乎不宜遽言其死、不知脈貴有神、倘浮沉遲數之間、

辨諸錄 卷之十五 胎前諸論 婦人小兒死脈訣
滑滑大小之際初按若有再按若無或散或亂或來或去全無神氣雖非旦夕之云亡必至歲月之難久何常非死脈哉倘代結之脈按之有神不過痰涎之壅塞寒痛之遏抑暫時之病未常非生也故決人生死全要看脈之有神無神爲貴耳

第五篇 婦人小兒死脈訣

鬼真君曰陰陽原無二道男女何有殊形五臟相同不必兩分彼此三部亦一寧須各論參差惟受娠成胎獨殊男子故辨妊論孕更別婦人尺中脈滑女經不調且有帶淋之病關中脈濇天癸已斷寧非鬱塞之疴左寸滑而左尺大懷子之兆左尺數而左關微有兒之徵左寸帶縱兩男之祥右寸帶縱雙女之喜左關左尺脈皆大心脈流利必三男右關右尺脈皆大心脈流利必三女然三部有一部之滯未宜遽許爲胎各脈無一脈之順何敢輕言是孕

子死母存尺浮而寸沉母亡子活尺濇而寸伏蓋子係於腎尺浮則子無生氣母係於肺寸沉則母有生機子係於尺尺濇而子之氣不散母係於寸寸伏而母之根已離沉細二脈胎欲離經浮滑之脈胞將卽產腹疼腰痛定然卽降漿來胞破未可言生身重體寒面又青脈無可畏心煩血燥舌兼黑脈斷堪憂子母難留唇口沫出娘兒全活面鼻顏黃新產脈緩自存胃氣新產脈滑未損脾陰實大旣形定非作信弦急兼見豈是休祥沉小實爲順候濇促半作逆觀脈微何足害尚可回陽脈洪反宜愁最嫌逆冷婦人之脈若此小兒之診若何三部不妨俱數祇慮沉遲六經各喜均長翻嫌細小惟弦緊不可驟揚恐來風邪之祟更虛濡不宜長見虞多水氣之殃急脈形於指下嘔吐而腹痛難痊大脈浮於關前瀉痢而心驚不救見此已可通彼知偏何難悟全哉

陳士鐸曰、男女之病、彼此相同、原無反背、故有病可據脈而同斷也、惟胎產前後、少異於男子、故鬼真君又傳此篇、而於論孕、娠獨詳也、至於小兒、原不必切脈、以氣血未全、各脈不十分全、準鬼真君之論小兒、亦約畧之辭、然而小兒純陽所生之病、多是飲食之傷、驚疳吐瀉之症、得此數言、以括其全、所謂要言不煩也。

又曰、婦人之脈、少異於男子者、左尺多旺耳、男子左尺旺、實非佳兆、女子左尺旺、此陰血有餘、轉是佳祥、蓋易於受胎也。

又曰、婦人之病、最難治者、以其性情多鬱耳、鬱則氣血卽不流通、經輒閉塞、而左關隨現瀆脈矣、故看婦人之脈、貴切肝脈、辨其瀆與不瀆、是第一秘法、雖各經皆有瀆脈、而左關不瀆、其鬱未甚也。

又曰、小兒之脈、弦緊弦急、俱是外邪、除此之外、皆內傷也、治內傷之法、以補脾健胃爲先、卽治外邪、亦當顧止、雖脈純現弦緊弦急、未可單祛外邪也。

